

Dusun - Koposion Buuk do Kinorohingan - Salvation Scriptures

- Iposus 2:2** Tontok nopoddi om tuminanud kou di koubasanan do dom pomogunan. Komoyon nopoddi om tuminanud kou di monguasa' do hilo'd tawan, iri no i rusod di maso do momorinta' do ginawo di tulun dit a' mumboyo' do Kinorohingan.
- Matius 6:10** Iya' no o Raja' dahai. Pokionuon dahai dot iya' o momorinta' do hiti'd pomogunan; om atanud o korohian nu'd hiti do miagal dot atanud do hino'd surga.
- Lukas 22:42** om otud no iyau om sambayang noddi do poingkaa, “Oi Apa', ondung milo no daa, om pounsoduwon no do mantad id doho' iti koinggoritan dit otimbabaan ku. Nga' a' indo tumanud di doho'd korohian, suwai ko' tumanud nopo do korohian do Tapa',” ka dau.
- Yohanis 16:7-9** Nga' otopot i' kopio o poboroson ku dokoyu do poingkaa: Osonong nogi' kopio dot id dokoyu do kotongkiad oku; tu' ondung a' oku kotongkiad om a' indo i Gomponguhup rumikot dot id dokoyu. Nga' ondung kotongkiad oku, om suhuon ku indo i Gomponguhup do rumikot dot id dokoyu. 8 Korikot nopondo iyau, om pointalang nondo iyau dot id tulun do hiti'd pomogunan do komoyon kopio'd dusa, om it otopot, om pasal do kowoyo-woyoo' do Kinorohingan do momohukum. 9 Om pointalangon nondo dau do dusa i' it a' monongkuya'an doho'.
- 2 Timotius 2:10** Iri no o kalanu-lanut do ginawo ku do tumanggung do koinsanai'ddi do maan do koinsanangan do koinsanai'd tulun di nongopili' do Kinorohingan, om kaanu i' iyolo' do koposion di patahakon di Kristus Yesus dot id diyolo', do mitonggoi do kagayaan dit aiso' o kopupuson.
- Rum 15:20,21** Kagayaan nopo kopio'd ginawo ku om popinsusui di Habar dot Osonong do mantad id Kinorohingan do hilo'd piro-piro kinoiyonon dit a' po o tulun nokorongou'd pasal di Kristus. Tu' mada' oku i' do koponimpuun do karaja' do hiri'd notimpuunan do tulun do suwai. 21 Haro i' o nokotulis dot id suang do Buuk do Kinorohingan do poingkaa, “Iri nopondo tulun dit a' po insan korongou'd habar dau, om onggokito nondo; om it a' insan korongou nga' kosuhut nondo,” ka.
- Winonsoi Di Rasu 2:36,37** Om apatut no do koilo kopio o koinsanai'd tulun dot Israil dot i Yesus nopo i pinasalib dokoyu'ddi, om iyau no i pinabatos do Kinorohingan do sumiliu'd Tuhan om Raja' do Gampamasi,” kad Pitrus. 37 Om soira'ddi nongkorongou i tulun diri di pinoboros di Pitrus, om tumongob tomod diri iyolo'. Om ponguhot noddi iyolo' di Pitrus om i piro-piro rasul di suwai, “Oi tobpinai-tobpinai, nunu nondo ot apatut dahai'd wonsoyon diti?” ka diyolo'.
- Ibrani 4:2** Tu' nokosusui no i Habar dot Osonong diri dot id dati' do miagal di

nokosusui dot id diyolo'. Nga' aiso' i' o guna' di habar diri dot id diyolo'. Tu' tontok di nokorongou iyolo'ddi om a' i' iyolo' minonongkuya.

Yeremia 24:7 Om onuan ku indo iyolo' do ginawo dit orohian do koilo dot iyoho' no o Tuhan. Om osiliu nondo iyolo' do tulun ku om osiliu oku do Kinorohingan diyolo', tu' aayi-ayi' nondo o ginawo diyolo' do gumuli' dot id doho'.

Winonsoi Di Rasu 16:14 Om haro'ddi o songulun o tondu' dot id pogialatan diyolo' dot i Lidia o ngaran. Iyau nopo om mantad hilo'd Tiatira om papadagang iyau do kain dit otomou daragang-ragang. Om iyau nopo om osianan kopio'd Kinorohingan. Om tingkaho' noddi do Tuhan o ginawo dau do rumamit di ponudukan di potudukon di Paulus.

Matius 13:14,15 Om nabayaan no i pinoboros mantad di Nabi Yosaya do poingkaa, 'Boros kad Kinorohingan: Korongou kou indo kopio nga' a' kou i' kosuhut; om poingontong kopio kou nga' aiso' i' o tokito dokoyu. 15 Tu' nokokodou no kopio o ginawo do tulun diti, om nosonsong o tolingo om nokoungkodom o mato diyolo'; om iyo noddi o nosiliu om a' i' kokito o mato diyolo', om a' korongou o tolingo diyolo', om a' kosuhut o pomusorou diyolo', om a' indo iyolo' koguli' dot id doho', om a' ku iyolo' olingasan,' ka," ka dau.

Yosaya 6:9,10 Om boros ka dau, "Pamanau no om sunudan ngai' no i tulun do poingkaa, 'Korongou kasai' kou i' nga' a' kou i' kosuhut di komoyon. Om poingontong kasai' kou, nga' a' kou i' koilo ondu' nunu i nosiliu,' kanto," ka dau. 10 Om boros kaddi dau dot id doho', "Pobosugon ngai' nopo o pomusarahan do tulun diti, om bosukon nopo o tolingo diyolo' om bolohon o mato diyolo', om a' i' iyolo' korongou, om a' kosuhut, om a' kokito, om a' i' koguli' dot id doho' om a' olingasan," ka.

Markus 4:11,12 Om boro-boros no i Yesus diyolo' do poingkaa, "Iyokoyu nopo om nopuhawangan no do toilaan do mongilo di poillisok do pasal di Pomorintaan do Kinorohingan. Nga' iri nopo i tulun dit id soliwani, om poinukadan i' o maan do ponuduk 12 tu', 'Poingontong piya iyolo' nga' a' i' koilo ondu' nunu it osiliu, om korongou i' iyolo' nga' a' i' kosuhut. Om iyo noddi ot osiliu, om a' i' iyolo' kokito om a' kosuhut, om a' korikot dot id Kinorohingan, om a' iyolo' ompunan do Kinorohingan,' ka," ka dau.

Yohannis 12:39,40 Iti no ot a' diyolo' koponongkuya tu' nokoboros mantad no di Yosaya o poingkaa, "Boros kad Kinorohingan, 40 'Bolohon ku o mato diyolo', om pokodohon ku o ginawo diyolo'; om a' indo kokito o mato diyolo', om a' kosuhut o pomusarahan diyolo'. Om a' iyolo' koguli' dot id doho'; om a' ku iyolo' olingasan,' ka," ka dau.

Rum 11:7,8 Iyo nopoddi, om poingkuro poo? A' i' i tulun dot Israil nakaanu di tihumon diyolo'. Iri nopo nakaanu'ddi om okuri' i' kopio, iri no i tulun di nopili'd Kinorohingan. Iri ngai' nopo i suwai om kuminodou ngai' o ginawo do nokorongou di lolohou'd Kinorohingan. 8 Tu' nokotulis no dot

id suang do Buuk do Kinorohingan o poingkaa, “Pinabasug do Kinorohingan o ginawo om pomusarahan diyolo’; om gisom piya do dinondo nga’ a’ i’ kokito o mato diyolo’ om a’ korongou o tolingo diyolo’,” ka.

2 Tosolunika 2:10,11 Om mamakai nondo iyau di toilaan dot araat do pamalid di tulun di kumaa dot id kapatayon. Patayon nondo iyolo’ tu’ mada’ i’ iyolo’ om a’ iyolo’ orohian di habar dit otopot do mantad id Kinorohingan, i milo daa do mamasi diyolo’. **11** Om iri noddi o kinoporikatan do Kinorohingan dot id diyolo’ di kuasa’ di mamalid, gisom do monongkayaan nogiddi iyolo’ dit a’ otopot. **12** Kootuson nopoddi om hukuman ngai’ nondo i tulun dit orohian do momonsoi’d dusa om it a’ otumbayaan dit otopot.

Matius 13:18-23 Om boros ka kawagu di Yesus, “Pokinongou kou no do komoyon di poinukadan do pasal di tulun di pinapasasad do linsou’d di. **19** Iri nopo linsou di nakasasad do hiri’d ralan om poiyaan di tulun di nokorongou do habar do pasal do pomorintaan do Kinorohingan; nga’ a’ iddi nokosuhut kopio’d di. Om rikot noddi i Yaraat, om ngoyo’ no dau ahawo’ i nakasasad daa do hiri’d ginawo diyolo’. **20** Om iri no linsou di nakasasad do hiri’d kowotuan, om poiyaan di tulun di nokorongou do habar diri, om it osonong nopo o ginawo om olomus do minonongkayaan diri. **21** Nga’ a’ iddi guminamut kopio i habar diri dot id ginawo diyolo’, om a’ guminirot. Om koontok poddi iyolo’ do kosusaan ko’ koinggoritan dot i habar diri o nokoponginggoritan, om pitilombus nopo iyolo’ do luminuhoi o kotumbayaan. **22** Om iri no linsou di nakasasad do hiri’d rolot di korugian om poiyaan do tulun di nokorongou do habar diri, nga’ atangkabo iyolo’ do pasal do koposi-posion diyolo’, om orohian nopod kaya’. Gowoi poddi om noolitan i habar do mantad id Kinorohingan dit id suang do ginawo diyolo’, om a’ minongua’. **23** Om iri no linsou di nakasasad do hiri’d tana’ dit oruak om poiyaan do tulun di nokorongou do habar diri om nokosuhut. Om pongua’ noddi iyolo’ dot asapou, om haro ot inghatus piluap o kogumuo’ do tua’, om haro ot ingonom nohopod, om haro ot intolu nohopod piluap,” ka dau.

2 Korintus 3:15,16 Om dinondo piya nga’ pomsompon kasai’ i’ di pinonirung o pomusarahan diyolo’ do tontok di mambasa’ iyolo’ di Tourat di Musa. **16** Nga’ ondung haro o tulun do tumimbaba’ do Tuhan, om iduwon indo i pinonirung diri do mantad id rabas di tulun diri.

Yosaya 30:28 Om suhuon dau i tongus do mogulu dau. Om miagal pori do luyud di momorulun do koinsanai’d nunu nopo. Oinsanan nopo o bansa’ dot angapatai om opupusan nondo i tongosorou diyolo’ dit araat.

Hosia 11:3-7 Om inda’ ka dot iyoho’ i’ o minonuduk dot Israil do mamananau, kinibit ku i’ i tulun ku, om kinosianan ku, nga’ a’ i’ diyolo’ okunon dot iyoho’ o minomogompi’ diyolo’. **4** Pinoinsomok ku iyolo’ doho’ do

mikuwo'd osianan om olisiu oku diyolo'. Kinibit ku iyolo' om tinunguban ku; om minirikau oku do pinapaakan diyolo'. 5 Minada' iyolo' do gumuli' dot id doho' om gowoi poddi om a' no milo dot a' iyolo' gumuli' do hilo'd Masir, om bansa' nondod Asur o momorinta' diyolo'. 6 Tumongkop nopondo di bandar diyolo' o pisangadan om angahaba' ngai' o totobon di bandar. Om iri nondo o karaag di tulun ku tu' momonsoi i' iyolo' di diyolo'd korohian. 7 Osonsog i' iyolo' do tumolikud doho'. Om minggiak pondo iyolo'd oinggoritan, nga' aiso' i' o milo do mongoi poidu' diyolo',” ka dau.

Winonsoi Di Rasu 26:18 do mongoi popoungkalat do mato diyolo', om koidu' i' iyolo' do mantad id totuong om kosuang dot id tanawau, om koidu' iyolo' do mantad id porintaon do rogon, om Kinorohingan nondo o momorinta' diyolo'. Om ongoompunan indo o dusa diyolo' dot i kotumbayaan diyolo' dot id doho' o kaampun, om osiliu indo iyolo'd tulun di songonuon do Kinorohingan do pounsugku' di tulun di nongopili' do Kinorohingan,' ka dau,” ka di Paulus.

2 Timotius 2:24-26 Iri nopo tulun di momonsoi do karaja' di don Tuhan om a' i' apatut do monokitogod; suwai ko' mositi' no dot osonong o kowoyo-woyoo' dau dot id koinsanai'd tulun, om osonong om alanut o ginawo do monuduk do koinsanai'd tulun. 25 Mositi' no dot alamaya' iyou do monuduk do tulun dit obinsaap; om maha' daa'ndo om onuan do Kinorohingan do maso i tulun diri do kumorologo do mantad id koinsanai di dusa diyolo' om kotutun indo iyolo' di ponudukan dot otopot. 26 Om iri no o ralan diyolo' do kopuriman kawagu', om koidu' do mantad id lawa' do Rogon, i minongogos daa diyolo' om minononsog diyolo' do tumanud di korohian dau.

Pinointalang 3:17-19 Momoros kou dot, 'Kaya' i' iyahai om haro ngai' i' dahai,' ka dokoyu. Nga' a' i' dokoyu oilaan do norutum tomod kou om aradaat kopio o koiyon-iyono dokoyu! Mosikin kou, om poillabas kou, om bolou kou. 18 Om iri no o kopomisunudan ku dokoyu do momoli'd tamas do mantad id doho', iri no i tamas dot osompipi', om kakaya' kou indo. Om momoli kou nogi' do pakayan dit opurak do mantad id doho' om kipakayan kou indo do ponirung do tinan dokoyu di poillabas om i kointingayam. Om momoli nogi' do tubat do pogihilon dot id mato dokoyu om kokito kou indo. 19 Iri nopo tulun di kosianan ku, om togodon ku i' om lopuson ku do monuduk. Iyo nopoddi, om pokoiso-isoon no kopio dokoyu o ginawo dokoyu, om rumologo kou no do mantad id koinsanai'd dusa dokoyu.

2 Korintus 7:10 Tu' katangaban nopo do miagal diri om poposimban i' do ginawo om poporikot do koposion. Om aiso' no o tulun do monosol do miagal diri. Nga' katangaban nopo di miontok nod korohian do tulun om poporikot i' dot id kapatayon.

1 Raja 18:37 Simbaro' oku no, oi Tuhan! Simbaro' oku no om koilo i' iti tulun dot ogumu' dot iya' no o Kinorohingan, oi Tuhan, om iya' o popoguli' kawagu diyolo' dot id diya',” ka dau.

2 Korintus 4:4 Iri no i ponokokinorohingan dit araat i momorinta' diti pomogunan o monompon do pomusarahan di tulun dit a' notumbayaan diri. Om iyou no o minangantob diyolo' om a' i' iyolo' kokito do tulinau do mantad id Habar dot Osonong diri, i pasal do kagayaan do Kristus i pinopointalang kopio'd Kinorohingan.

Lukas 8:11-15 Om boros ka kawagu di Yesus, “Iti no o komoyon di poinukadan diri: iri nopo i linsou diri, om iri no i boros do Kinorohingan. **12** Om iri no linsou di naratu' do hiri'd ralan, om poiyaan di tulun di nokorongou di boros diri. Nga' rikot no o rogon, om ngoyo' no ahawo' i boros diri do mantad id ginawo diyolo', om a' indo iyolo' otumbayaan om a' iyolo' apasi. **13** Om iri no linsou di nakasasad do hiri'd kowotuan, om poiyaan di tulun di nokorongou do boros diri, om osonong nopo o ginawo do ruminamit diri. Nga' a' iddi guminamut kopio i boros diri dot id ginawo diyolo'. Om oruhai iyolo' do minonongkuyaan, tu' koontok poddi iyolo'd pogumbalan, om katanus no o kotumbayaan diyolo'. **14** Om iri no i linsou di nakasasad do hiri'd rolot di korugian om poiyaan do tulun di nokorongou do boros diri, nga' atangkabo nopo iyolo' do koposi-posion diyolo', om orohian nopo do kumaya' om sumimbayan do hiti'd pomogunan. Om iri ngai' noddi o nokoonsit diyolo', gisom dot aiso' o nokotuo do tua' diyolo'. **15** Om iri no i linsou di nakasasad do hiri'd tana' dit oruak om poiyaan do tulun di nokorongou do boros diri, om i pinopoopi' kopio'ddi dot id suang do ginawo dit osonong om it otulid. Om ogirot iyolo' do gisom do nokopongua',” ka dau.

Winonsoi Di Rasu 15:11 Nga' notumbayaan toko' i' om pinasi toko' tu' nosianan i' o Tuhan Yesus dati'; om iyolo' nga' iyo nogididi,” ka di Pitrus.

Rum 8:13 Tu' ondung tumanud kou di korohian do kowoyo-woyoo' do don tulun, om apatai kou i'; nga' ondung pipatai-patai dokoyu i wowonsoyon dokoyu di kidusa, dot i kuasa'd Rusod do Kinorohingan o pamatai, om apasi kou no.

Pastor T. John Franklin
Church of Salvation, Healing, and Deliverance
COS-HAD.org